

Ein Barb fähret an gut zu seyn im Meyen/ vnd währet bis im Häwmonat/ aber der Kogen darvon ist nimmer gut.

Die Krebs seyn im Merken vnd Aprillen am allerbesten/ vnd bevorab wenn der Mon wächst/ so seyn sie sehr gut/ wenn aber der Mon abnimpt/ so seyn sie etwas geringer vnd schlechter.

Ein Esche fähret an gut zu seyn im Häwmonat/ vnd ist im Herbst am besten.

Was nun mehr vor Fisch hieher gehören/ vnd wenn ein jeder gut oder nit gut zu essen/ wenn ein jeder auch am besten seye/ dasselbige stelle ich eines jeden erfahnuß vnd verbesserung heim/ das ich es auff dißmal wil erwinden lassen.

Ende des eilfsten Buchs.

Das zwölffte Buch.

**Betri de Crestentiss / vom Adelichen Weidwerck / Nemlich / Falcknerey / Beissen vnd Feder-
spiel/ von Falckner oder Habicher / von Winden / Wachteln oder Beishunden/
wie dieselbigen auff die Beiß abzurichten/ wie man allerley Feld vñ Wassergeflügel / als Kranich/
Reyger/ Gänz/ Andvögel/ Wachteln/ Räbhüner mit Rauzen/ Lockvögeln/ vnd Lock-
pfeiffen/ Necken/ Stricken/ Leim/ vnd Geschosz/ beissen/ bevo-
geln vnd fahen soll.**

Das erste Capitel.

Von Adelicher loblicher vbung der Falcknerey.



Jeweil Gott der Allmächtige ausz seiner ewigen Weisheit/ anfänglich die Herrschafft der Thier auff Erden/ vnd Fisch im Wasser/ darzu der Vögel vnter den Himmel/ dem Menschen übergeben vnd befohlen/ So die Menschenkinder vnd Besitzer des Erd- bodene/ auch billich derselbigen Herrlichkeit/ als eines freygeschenkten Guts/ mit dankbarkeit zu jrem nutz/ guter Leibs vbung vnd Gesundheit/ wol vnd rechtmässig zu gebrauchen wissen. Darumb so wol das Federspiel vnd Falcknerey/ als auch der Wildfang/ ein Adeliches/ Herrliches vnd rechtmässiges Weidwerck ist/ Denn das Lustige Weidwerck nicht weniger hurtige/ starcke/ gesunde vnd gerade Leute machen/ als auch das Landweidwerck zu thun pfleget.

h h h ü

Darum